

[Augsburg], [vor 23. August 1570]

An Eusebius Episcopius

Druck: Demosthenes, Basel 1572, VI, S. 178.

HIERONYMVS VVOLFIVS
EVSEBIO EPISCOPIO SVO S.

Quanti manuscriptos codices plerique faciant (quos nec ipse contemno) cum non ignorarem: dolui sanè, Augustanae reipublicae uetustissimum Demosthenis exemplar, cùm ob temporis angustias, tum propter exoletas et minutas literas, à me, ne uitreis quidem istis Lamiarum oculis adhibitis, potuisse perspici, et cum impressis conferri. Sed cum mihi Lutetiana editio de sententia D. Theodori Zulingeri: cuius iudicio plurimum tribuo: et tua, mi Episcopi: cuius uoluntati in re honesta, morem gerere et debeo, et cupio: pellegenda, graecolatini Demosthenis impressionem prorogasset: egi cum egregiè docto et honesto uiro, Simone Fabricio, scholae nostrae magistro diligentissimo, cuius et ingenij acumen, et acies oculorum, et in graecis literis iudicium atque exercitatio nota mihi essent: ut eam prouinciam (si aut res facultatem haberet, aut, si quod operaeprecium se facturum esse confideret) suscipere ne grauaretur. In quo ille mihi et pro necessitudine nostra non modò priuata, sed etiam publica (sumus enim collegae in eodem graecas latinasqüe literas docendi munere) et ob rei literariae promouendae studium haud grauate morem gessit: atque opere confecto, hoc modo ad me scripsit.

(inserierter Brief von Simon Fabricius an Wolf, vor 13.8.1570)

Ego uerò singulari diligentia, et iudicio uiri egregiè docti delectatus, pleraque ab eo notata, subieci: quamuis animaduerterem, Augustanum codicem habere non pauca et cum meis coniecturis, et cum caeteris ἐκδεδομένοις τὲ καὶ ἀνεκδότοις consentientia. In hoc enim genere contra praeceptum Isocratis, πλεονάζειν ἀλλὰ μὴ ἐλλείπειν εἰλόμην. Quod factum nostrum in optimam partem candidos lectores accipere, et aerumnis nostris suo commodo frui uelim. In eo autem, quod idem Fabricius censem, totum exemplar esse de integro describendum: his de causis ab illo dissentio, quòd et qui id bona fide praestare possit, eo ipso excepto, hic scio neminem: et, eandem lectionem ex aequo probaturi omnes non essent: et ex hac uarietate diuersarum lectionum, ea quiuis homo doctus facilè deligit, quae maximè probet: et ἡ τετριμένη ὁδὸς, κατὰ τὴν παλαιὰν παροιμίαν, ἔστιν ἀσφαλεστάτη. Vale.